




30925

Mag. St. Dr.

P

758.

Putanova Jon. Ulozpi: Liberae. Mores. Religio
sen de triplini scopo juventutis instituenda
Oratio academica.



LITTERÆ. MORES.
RELIGIO.

^{SEV}
DE TRIPLICI SCOPO
JUVENTUTIS INSTITUENDÆ.
ORATIO
ACADEMICA.

Sub felicissimo regimine

Magnifici Perillustri & Admodum Reverendi Domini,

D. M. CASIMIRI STEPLOWSKI

S. Theologiæ Doctoris & Professoris, Ejusdemq: Sacræ Facultatis Decani & Procancellarii, Collegii Majoris Senioris Patris, Ecclesiarum Collegiatarum S. Floriani Clepardie ad Cracoviam Decani, in Summo Posnanienſi Cancellarii, SS. OO. Cracovia, & Parochialis S. Jacobi Casimiriæ Præpositi, Librorum per Diæcesim Cracoviensem Ordinarii Censoris, Ordinandorum & Approbandorum Pro-Synodalis Examinatoris, Seminarii Academico-Diæcesani, Contubernii Siski-ani & Alumnatus Rolzcewiani Provisoris, Studii Generalis Uni-

versitatis Cracoviensis

AMPLISSIMI RECTORIS.

Per

M. JOSEPHUM ALOYSIUM PUTANOWICZ,

Sacræ Theologiæ Doctorem, Philosophiæ Eclecticæ in Collegio Majori Regium Professore, Ecclesiarum Collegiatarum Insignis Neo-Sandecensis Primicerium, S. Annæ Crac: Canonicum, Parochialium in Lanckorona & Rabka Curatum, Librorum per Diæcesim Cracoviensem Ordinarium Censorem, Coloniarum Academicarum Culmenſis & Sandecensis Proviforem, & Generalem Visitatorem, Geometram Strzatkovianum Juratum.

Aum

Maximâ Amplissimorum Virorum frequentia,
In Jagellonica Universitatis Cracoviensis Aula,
Primas in A.A. LL. & Philosophia Laureas,
VIII. VV. DD. Ejusdem Laureæ Candidatis,



Quorum Nomina & Cognomina,

- I. V.D. NICODEMUS GODZIEMBA
in magna Kobylki, KOBYLECKI.
- II. V.D. FRANCISCUS MARCISZOWSKI.
- III. V.D. MARTINUS ŁAGOWSKI. Crac:
- IV. V.D. CAROLUS WEYSS. Crac:
- V. V.D. VALENTINUS KRZYZANOWSKI.
Crac:
- VI. V.D. XAVERIUS RYSZKOWSKI.
- VII. V.D. ANTONIUS PIORECKI.
- VIII. V.D. ANTONIUS SOSNOWSKI.

Ritu solemni conferret;

Annō Domini 1768.

Die 27. Mensis Octobris.

R E C I T A T A.

CAR-

30925/5

CARMEN HEROICUM.

*In gratiam VV. DD. Primæ Laureæ
Candidatorum.*

Cùm Vestrùm passus Academi limina tangunt,
Ejus ad illustres, ferventes curritis umbras,
Frontibus hic vestris largitur laurea ferta,
Pro quibus à vobis optat poscitq; vicissim;
Ut, cùm Sceptringeræ reddatis nomina Matri;
Illi cor, animum, simul & sacretis amorem.
Nominis hæc ratio cujusvis obligat omnem,
Ejus ut officium susceptum fiat ad unguem.
Quid juvat ignivomi censerì nomine Martis?
Muniri galea caput ejus? pectora scuto?
Terga premi spumantis equi? gladiosque vibrari?
Ad pugnam campos metari, quid juvat inquan?
Si desint animus pugnandi, prompta voluntas.
Eximii Juvenes, herodès arte probati,
Nomine præclaro distincti Palladis almæ,
Illius campum cùm descendatis in amplum,(
Divite perveteris jam laudis messe refertum,
Quem Jagellonei fecundant valde Manipli;
Quò selecta feget crevit, crescitq; Virorum.)
Hic omnem lapidem, fervens studiumque movete,
Decertaturi pro caræ Gentis honore.
Non vagina manus oneret, sed pagina docta.

Non gladiis, verum calamis certare necesse:
Non in pugnaces acies, hic Marte ruendum.
Hic docili laurus, victrices arte parantur.
Mentibus ingenuis atrox dispareat hostis.
Segnities animos, enervans, otia fæda:
Clara Patrum vestigia nunc præponite vobis(
Quorum sunt alii Sanctorum sede recepti,
Et fastis alios inscripsit publica fama,
Incolumes alios veneratur Cracia Pallas)
Qui non parcentes vitæ, studioq; laboris,
Rerum nequaquam metuunt angusta subire;
Ut plus plus Gentis florescat fama Togatæ.
Illud præprimis volo, mente revolvite Vestra,
Præclarus magnusque Pater quod dixerat olim:
Spartham susceptam aut orna, vel desere certè.
Quare conatus illuc convertite totos,
Enixas curas, studium, vigilesque labores;
Unde fluat præstans Academi gloria nostri,
Artibus innixos Vos, & virtutibus istis,
Semper honos, nomenq; bonum, laudesq; manebunt.

Quod' aggratulando vovet:
M. STANISLAUS KALECINSKI
Philosophia Doctor, Rhetorices Professor.

ORA.

O R A T I O.

SI quis Vestrum expectat AA. quodnam Orationis argumentum, ego hodie in hoc celeberrimo Sapientissimorum Viro-
rum conventu, tractandum potissimum elegerim; consideret
ipse secum; quorum gratia publice dicendi consilium susce-
perim; non dubitabit quid me sentire conveniat, cum ad quos
mihi dicendum necesse sit cogitarit. Dicendum autem est ad Ado-
lescentes istos, qui humaniorum litterarum curriculum emensi, sa-
pientiae amore capti, atque verae laudis cupiditate allekti, nomina
sua florentissima huic Academiae ultro dedere: ut opportuna sci-
entiarum suppellectili abunde instructi atque etiam ornati, una sibi
Patriaeque cari vivere; & quod caput rei est, quove omnia stu-
dia nostra referri oporteat, Institutum Academicum olim cum di-
gnitate possint profiteri. Nulla vero in re, nisi me mea fallit opi-
nio, operam suam utilius collocare valuerunt. Quid enim Insti-
tuto Academico aut opportunius, aut praestantius, cogitari aut opta-
ri potest? Nam si omnium retro aetatum consensu, atque Sapien-
tium iudicio, cum omnium Regnorum & populorum felicitas, tum
maxime Reipublicae Christianae salus, a recta Juventutis instituti-
one (quae quidem rudes adhuc animos ad humanitatem flectit;
steriles alioquin & instructuosos, Reipublicae muniis idoneos &
utiles reddit: Dei cultum, in parentes & patriam pietatem, erga
Magistratus reverentiam & obedientiam promovet) pendere digno-
scitur: quid putatis? nonne Viri illi, qui istiusmodi provinciam
tot difficultatibus, vigiliis, laboribus, arumnis circumseptam, nedum
in partes suas suscipiunt; sed etiam fortiter & feliciter obeunt,
infinita propemodum beneficia, in universum hominum genus con-
ferre videntur? At vero cogitationes istae, si quibus, quemadmo-
dum non diffiteor, cordi sunt; totam proculdubio Academiae no-
strae mentem absorbent. Voluerunt equidem Augustissimi Reges
nostri, quibus nobilem ortum debet primogenita Regum filia Uni-
versitas, publicam apud nos patere cujuslibet scientiae officinam;
in qua animorum merces non quaestui habentur, sed dono vene-
unt.

unt: voluerunt perennes purioris litteraturæ scaturire fontes, è quibus divites æquæ ac pauperes, ignoti ac nobiles, peregrini ac populares, pleno ore hauriunt, emuntque aquas absque argento, quod & ego cum multis jucundissime sum expertus. Istic illi domicilium, istic patriam, istic firmissimam velut arcem Musis erexere.

Nolim tamen ego AA. ut dum ad scientias & honestatem formandæ juventutis nobis creditam curam contendo; quasi absolutos omnibus numeris Oratores, satidicos Pœtas, consummatos Philosophos, qui aut cum Tullio de palma contendant, aut cum Marone sponte carmina fundant, aut cum Aristotele de primatu decerent, quo nihil fere majus, è Scholis nostris me velle prodire intelligatis: equidem & ego officii nostri partes inconsulta temeritate altius extollere viderer, & vos plus quam æquitas ferat, à nobis postulare crederemini. Muneris nostri est inchoare & informare opus, prima quasi lineamenta ducendo, non ad summam absolutionem perfectionemque perducere. Commonstramus pueris certum finem quò tendere, tutum iter quod ingredi, errores & pericula quæ vitare debeant. Uno verbo: firmissima à nobis totius operis fundamenta ponuntur: jaciuntur vera, sincera, incorrupta bonarum omnium artium semina. Quanti sit autem seminis virtus, quanta fundamenti vis, quamvis utraque lateant, & in obscuro sint, nemo non intelligit. Has Academici muneris partes nullo non tempore tentant diligenter tueri periti, quibus semper floruit Universitas Magistri: eò omnem operam locantes; ut Juventus institutioni suæ concredita, cum ingenuis honestisque artibus imbueretur, tum ad quævis humanitatis officia, morumque suavitatem componeretur, & quod primum princepsque est, ad Religionem sanctam, non specie tenus, sed re quidem ipsa formaretur.

Tria enim sunt, quæ in præcellenti adeo educandæ Juventutis munere Alma Studiorum Parens Universitas sibi proponit, ad quæ velut ad regulam & amissim omnes eos, quibus publicam docendi provinciam imposuit, respicere maximopere desiderat. *Litteræ: Mores. Religio.* Atque primas quidem curas in culturam ingeniorum intendit, disciplinis videlicet illis instruendo puerorum animos, quas ætas illa tenera, at nimis tenax ferre possit. Tum sese ad moderandos affectus, sedandasque animi passionés convertit, jam ad bonum honestumque virtutis amore invitando, jam

jam à malo turpiquē formidine pænæ deterrendo: tales scilicet volens spectare prætexitatos, quales patria cives habere optaret. Denique cū Religione nihil habeat antiquius, in ea nedum tuenda, sed etiam Juvenum animis instillanda insculpendaque tota quasi occupari videtur: ut ij qui è sua Palæstra prodeunt, nedum rectè sapere, sed quod reliquis ceteris anteponendum puto, sanctè & religiosè vivere discant. En igitur triplex Universitatis scopus, atquē meæ Orationis summa! de quo quidem differendum in præsentiarum mecum constitui; cū ut animos vestros Lectissimi Adolescentes ad ritè obeundum Institutum Academicum vel leviter præpararem: tum ut ijs qui istiusmodi provincia, potiore ætatis suæ parte, magna & nominis sui existimatione, & Academiæ laude perfuncti sunt, hodiequē funguntur, commemoratione susceptorum pro publico laborum non leve solatium adferrem. Brevibûs, quantum potero, me expediam, Vos AA. attentos patientesquē, pro summa in me humanitate & benevolentia, iterum iterumquē rogo.

I. Quod si probè nosse desideratis AA. quo loco habendi sint illustres illi Viri, quibus præclarum instituendæ Juventutis munus incumbit, pensate velim animò, quantum ingenuæ artes & scientiæ nedum ornamentis, verum etiam commodi Rebuspublicis adferant: in quo quidem non multum laborandum est, si quid discriminis cū inter singulos homines, tum inter totas gentes à litteris habeatur, consideremus. Et ut ab integris hominum catibus rem ordiamur, videte, videte quæso Atheniensium Rempublicam angustis admodum circumscriptam limitibûs; quod tamen Regnum, quid dico Regnum, quem angulum terræ, nomininis sui celebritate non illa complexa est? Illa veluti facunda parens, quot homines, tot ausim dicere miracula Orbi est enixa. Inde eloquentissimi Oratores, inde bellicosissimi Duces, inde sapientissimi Legislatores, inde Viri artis regendi peritissimi longa serie prodire. At verò litterarum hic partus est, quæ cū ad summam absolutionem perveniunt, Regnorum quoquē, in quibus vigent florentquē, fortunam & gloriam ad supremum provehunt fastigium. Roma Mundi Domina, diuturno belli usu edocta, armorum quidem potentia, & continuo victoriarum cursu, universale imperium sibi asseruit: dominatio hæc tamen non regnum, sed vis & immanitas fuit: tum demum devictis populis ex vero dominari cæpit, cū erudita Græciæ spoliis facta potentior, sapientiæ Monarchiam in se transulit; quem hodieum etiam reliquis pene omnibûs mutante vices

te vices fortuna amissis, in universum hominum genus feliciter exercet. Equidem principatus litterarum praesidiis comparatus fato superior est, vim nequidquam metuit, secula vincit, duratque in ævum. Quodsi adeo verum est, ut inter omnes Nationes, ex opibus, imperio, & publica felicitate semper præcelluerunt, quæ sapientioribus legibus gubernatae sunt: & ut ad fontem redeam, quæ præ ceteris impensius litteras coluerunt: Oro enim vos AA. quid erant tot populorum leges, nisi veluti succus sapientiæ, ac temporis diuturnitate consummatae intelligentiæ? facile perspicitis, cur aut Africa illustrium retro Toga Sagoque Virorum ferax patria, de pristino splendoris dignitatisque gradu delapsa in tenebris oblivionis consepulta jaceat? aut cur non eò quoque imperii & felicitatis venire penitissimi Scythæ & Lapones, Peruviani, Caffari, moribus & vitæ consuetudine efferati, litteris ac legibus destituti, ac una pene dixerim forma effigieque corporis à belluis discriminati? Videtis ex adverso Cis-Alpinos illos atque Septemtrionales populos, quos defectu litterarum ut aggresstes barbarosque homines antiquitas reputaverat; quomodo peregrinis hospitio exceptis, atque etiam civitate donatis Musis, quomodo inquam deterfa illa ruditatis maculâ, ingenio, industria, urbanitate, opibus, potentia, cum reliquis gloriose decertent? quid dico decertant! an non potius invidiam & æmulationem provocant ceterorum? Res adeo in comperto est, iisdem gradibus Respublicas sua capere incrementa, quibus & studia litterarum augentur. illæ Civium mores, alioquin feros cicurant, & ad recti honestique ideam componunt, illæ leges sapienter ordinant, illæ internam externamque politiam prudenter administrant, illæ integros populos in obscuro languentes è tenebris in lucem efferunt.

Sed quid ego historiarum percurro monumenta? satis est vel ipsam naturam contueri. Equidem quis non videat inter duas glebas quæmetfi ejusdem indolis, cultio ipsa quantum discriminis ponat? Altera absque colono relicta, quid, nisi spinas & tribulos in censu referet? Altera si pertinaci labore excolatur, multiplici frugum fructuumque copia dives, jucunda florum varietate ornata, quidquid rarum, quidquid salubre, quidquid gustui suave in parvo complexa, omnium tempestatum & regionum generatus ordine producet. Haud secus ingenia: neglecta quidem sterilia jacent; subacta, operæ pretium multo fenore compensant. Nihil enim, credite Tullio, est feracius ingeniis, iis præsertim quæ disciplinis

disciplinis exulta sunt. Et quemadmodum nulla res magis animos induit honestos, & in prævum inclinabiles revocat ad rectum, quàm bonorum conversatio: sic mens consuetudine sapientum ignorantiam excutit, fallia præjudicia dediscit, claras distinctasque rerum notiones acquirit, veritatem in abdito latentem detegit, atque cum magnis illis Viris, quorum studio tenetur, augetur & grandescit.

Neque verò studia litterarum ita comparandis scientiis deserviunt, quin etiam ad feliciter tracienda belli pacisque momenta, si non ex toto, maxima profectò parte contribuant. Equidem non eo inficias, plerosque solo bellandi usu edoctos, non postrema militiæ laude floruisse. Verùm illos ego maximopere suspicio, qui præter gloriam Imperatoris, nomen quoque sapientis sunt adepti. Quibus enim non laudibus celebrandus Victor ille Carthaginis & Numantiæ Scipio Africanus? Tam elegans ille liberalium studiorum omnisque doctrinæ & auctor & admirator fuit: ut Polybitum, Panætiumque præcellentes ingenio Viros, domi militiæque secum habuerit. Neque enim quisquam hoc Scipione elegantius intervalla negotiorum otio dispunxit, semperque aut belli, aut pacis servit artibus: semper inter arma ac studia versatus, aut corpus periculis, aut animum disciplinis exercuit. Quid: si sola librorum lectio usum rei militaris interdum supplere valeat? Quid dicam de Lucullo? Magnum profectò ingenium Luculli, magnumque optimarum artium studium, tum omnis liberalis & digna homine nobili ab eo percepta doctrina. Ab eo ars Imperatoria non admodum expectabatur. Sed incredibilis quædam ingenii magnitudo non desideravit indocilem usus disciplinam. Itaque cum totum iter, & navigationem consumpsisset partim in percontando à peritis, partim rebus gestis legendis, in Asiam factus Imperator venit, cum esset, teste Tullio *l. 4. aa. qq.* Roma profectus rei militaris rudis. Jam si à Sago ad Togam gressum faciam, nulli ego curationem Reipublicæ credendam rectè putaverim, quin de ejus consummata sapientia palam constiterit. Quis enim tanta doctorum Virorum consensione dicere Plato potuerit: tum beatas fore Respublicas, cum art Philosophi regnant, aut Reges philosophantur? Et merito: ei quippe, cui Respublica commissa est, loquar cum Tullio *l. 1. de legibus*, oratio & sapientia necessaria est, qua regat populos, qua stabiliat leges, qua castiget improbos, qua tueatur bonos, qua laudet claros viros, qua præcepta laudis & salutis aptè ad persuadendum edat suis Civibus, qua hortari ad decus, revoca-

re à flagitio, consolari possit afflictos, factaque & consulta fortium & sapientum cum improborum signonimia sempiternis monumentis prodere.

Verum enimvero si ex litteris delectatio tantum peteretur, tamen hanc animadversionem humanissimam & liberalissimam judicarem. Nam ceteræ res neque temporibus, neque locis omnibus sunt aptatae. Ipsa verò multarum artium scientia etiam aliud agentes suos oruat, atque ubi minime credas, eminet & excellit. Quinimo nisi nobis ipsis graves esse velimus, nisi lucis hujus usura, qua homini nihil carius, nobis invisa sit, colenda sunt litterae, sine quibus otium mors est & vivi hominis sepultura. Quod si tot tantaque emolumenta cum in singulos homines, tum in universas nationes à litteris profiscuntur: facile perspicitis AA. quanta sit Magisterii ipsorumque Magistrorum dignitas & praestantia, qui in praecellenti adeo provincia versantur. Quam enim parentibus, eandem illis praeceptoribus generis humani, à quibus tanti boni initia fluxerunt, venerationem deberi, meritò dicebat Seneca *epist. 46.* Atque eò majorem deberi pronuncio: quòd parentes filiorum corpora effigiant. Praceptor discipulorum mentes format. Quæ res tantò pretiosior videri solet, quantò homo interior, homine exteriore est praestantior. Accuratissimâ igitur diligentia istiusmodi partes tractandæ sunt Academici! si Reipublicæ bono, si Magistratuum dignitati, si Universitatis honori, si nostræ quoque exultationi rectè volumus consulere. Ita tamen satagamus oportet, ut illi quos instituendos accepimus simul & docti fiant, & moribus imbuantur. Quod alterum Orationis caput.

II. Equidem si omnis industria Magistrorum in eo solum versatur, ut juvenes liberalibus artibus exculti, varia multiplicique eruditione abundè instructi è sua Palæstra prodeant, neglectâ prorsus, aut posthabitâ vitæ morumque disciplinâ, neque Reipublicæ integritati affatim consultum, neque principi fini, ad quem naturâ ipsâ comparati sumus, satis provisum crediderim. Homo naturaliter est animal politicum & civile, atque ita nos nati videmur, ut inter omnes esset societas quædam. In quo quidem communi generis humani commercio, neque otiosa, neque ignava membra nos Deus voluit, sed per singulos sua quæque, quibus rite fungi oporteat, officia dispersit. Quid verò præclari absque virtute præstare poterimus? An bonus Civis esse potest, quin unâ & bonus Vir necesse sit? An beatam societatem illam dicemus, in qua nulla virtuti reverentia, nullum studium honestatis? An non palam

cernimus?

cernimus, quòd sola virtus, veræ solidæque laudis gustum nobis ingenerat; amorem Patriæ inspirat; publicam felicitatem privatis fortunis ant. ponere, suscepti officii munus adimplere, integritatem & justitiam præprimis sectari, vitia abhorrere, in agendis faciendisque ad solius conscientiae testimonium, bonorumque adprobationem attendendo, fucatum atque perbreve gloriolæ splendorem, ut cum vita evanescentem, incorrupto æternoque posteritatis iudicio posth. bere, nonne virtus inquam nos docet?

Verum qua v. a ad virtutem eluctari quisquam poterit, nisi aliquis & ductor & auctor sit? Natura quippe, quemadmodum prudentissimus juxta ac eloquentissimus Cicero, in suis de Philosophia libris dixerit, parvulos nobis igniculos dedit, quos celeriter malis moribus, opinionibusque depravatis sic extinguimus; ut nusquam naturæ lumen appareat: sunt enim ingeniis nostris semina innata virtutum, quæ si adolescere liceret, ipsa nos ad beatam vitam natura perduceret, nunc autem simul ac editi in lucem & suscepti sumus, in omni continuo pravitate, & in summa opinionum perversitate versamur, ut plane cum lacte nutricis, errorem suxisse videamur. Admovendæ igitur sunt faces, ut istiusmodi scintillæ flammam concipiant; riganda crebrò hæc semina, quòd fructum virtutis et honestatis adferre possint. Et hoc quidem est, quod optimi quique Magistri in educanda juventute maximopere curare debeant. Nullum enim, uti rectè advertit laudatus Tullius 3. de Div. munus Reipublicæ majus meliusve asferre possumus, quàm si doceamus, atq; juventutem erudiamus, iis præsertim moribus atque temporibus, quibus ita prolapsa est, ut omnium opibus refrenanda atque còercenda sit. Atque ita doceamus; ut dum pueros Græcis Latinisque litteris instructos desideramus, priscos utà laudatissimæ antiquitatis mores, in cereis eorum animis effigiemus. Quorsum enim liberalibus studiis illos erudimus? nisi quòd ista animam ad accipiendam virtutem præparant. Parum equidem refert, si juvenes quæ pulchra & verboria, non item quæ solida & utilia didicerint. Quid enim horum ad virtutem viam sternit? meritò querebat Seneca Ep: 39. Syllabarum enarratio, & verborum diligentia? & fibularum memoria, versuum lex ac modificatio? Quid ex his metum demit, cupiditatem eximit, libidinem frenat? Cujus ista errores minuant? Quem fortiorem, quem justiorem, quem liberaliorem facient? Exercenda est adeò puerorum industria, ut quæ adolescentum, quæ constantis ætatis, quæ senum officia sint, intelligant; ut quid domi, quid militiæ, quid à privatis, quid ab iis

qui cum imperio sunt, prestari debeat, non ignorent: ut noscat pauper, quomodo tolerare inopiam; dives, quomodo divitis uti debeat; quid inter patrem & liberos, quid inter virum & uxorem; quid inter fratres, cognatos, amicos, cives, quid denique inter omnes homines observari par sit, perspectum habeant: verbo; ut cum singularum virtutum vim atque naturam perspexerint, earum genuina simulacra moribus actionibusque suis exhibeant.

Haud verò alia via & ratione operosum adeo negotium felicius expediendum crediderim, quam exemplorum auctoritate. Atque in primis, siquidem facile ad virtutem erudiuntur, qui cum melioribus conversantur: cum qui alios formandos suscepit, tanta decet gloria virtutis excellere, ut instar solis, ceteros velut stellarum igniculos in sui fulgore obscuret: debetque huiusmodi vitam habere immaculatam atque compositam, ut omnes in illum & in ejus mores, veluti in exemplar aliquod excellens, intueantur. Sed & verborum quoque, tum sermonis ipsius ratio omnino habenda est; maxima quippe pueri debetur reverentia, quandoquidem nulla ad curiosas illas tenacesque aures vox impunè perfertur. Cavendum igitur diligenter, ne per ejusmodi ostia, ad secretiora mentis, pervulgati illi clamores penetrent: quibus è corrupto seculi sensu nihil jucundius, quam voluptatum lenocinia, nihil utilius, quam divitiarum affluentiam; nihil honestius optativusve, quam magnificientiam impotenter celebrari non raro nos ipsi sentimus. Quæ quidem publica insani vulgi præconia plus exitii juventuti adferre possunt, quantum fabulosi Sirenium cantus navigantibus mare præstare nequibant. Illa enim vox, ut egregie monet Seneca *Ep: 31.* quæ timeatur erat blanda, non tamen publica: at hæc quæ timenda est, non ex uno scopulo, sed ex omni terrarum parte circumsonat. Sit ergo suatu laudati Sapientis *Ep: 94.* aliquis custos, & autem subinde pervellat, abigatque rumores, & reclamet populis laudantibus. Immo verò necessarium est admoneri, & haberi aliquem advocatum bonæ mentis, èque tanto fremitu falsorum, unam denique audire vocem, quæ tantis clamoribus ambitiosis exsurdato salutaria insusurret.

Quis tamen fidelis illius constantisque monitoris personam aget? Juvenes quidem in nudis siccisque præceptis è more nanteant; alienis adeo factis, quibus delectari consuevit illa ætas, ad imitationem æmulationemque virtutis provocandi. Si velimus eos contagione seculi, falsique vitiorum præjudiciis exuere, revocandi sunt

longe

longe à vitiorum exemplis; transferendi ad meliores; cum Ceteris
nibus, cum Lelio, cumque ceteris illustribus antiquitatis Viris vi-
vendum ipsis est. His enim illi & auctoritatis plurimum defe-
runt, & monitis ipsorum non inviti obtemperant. Antiquitatem
itaque consule, antiquitatem adi, quoties aut divitiarum contem-
ptum, aut voluptatum fugam, aut fortitudinem, aut temperantiam,
aut reliquas virtutes volueris persuadere. Dabit illa Consules,
dabit Dictatores, ab aratro ad fasces assumptos. Quid verò magis
indignum videri poterat? sed illæ rustico opere attritæ manus sa-
lutem publicam stabiliunt. Curio ad focum sedenti magnum
auri pondus Samnites eum attulissent, repudiati ab eo sunt. Non
enim aurum habere præclarum sibi videri duxit; sed iis qui ha-
berent aurum imparare. O pulcherrimum restringendæ sitis divi-
tiarum exemplum! Sed & frugalitatis & parsimonix illustria mo-
numenta haud difficile repereris. Quàm jucundum spectaculum!
Fabricius ad focum cernat. illas ipsas radices, quas in agro repur-
gando triumphalis senex vulsit. Parum scitè ille convivia exor-
nabat: at illa multo optima Reipublicæ doctus erat, domi, rege-
re cives, militæ, ferire hostes. Quid dicam de Augusto? hic Ur-
bem excoluit adeò, ut iure sit gloriatus, marmoream se relinquere,
quam lateantiam accepisset. Ipse tamen, teste Suetonio in *Aug*: ha-
bitabat adibus neque laxitate, neque cultu conspicuis. Instru-
menti ejus & supellectilis parsimonia apparebat in lectis atque
mensis: quorum pleraquæ vix privatæ elegantix essent. Quid di-
cam de Scipione? Magna me profectò, loquor cum Seneca *epist.* 86.
voluptas subit contemplantem mores Scipionis ac nostros. In hoc
angulo ille Carthaginis horror, cui Roma debet, quòd tantum
semel tacta est, abluebat corpus laboribus rusticis fessum, exerce-
bat enim opere se, terramque (ut mos fuit priscis) ipse subigebat.
Sub hoc ille testò tam sordido stetit: hoc illum tam vile pav-
mentum substinuit. At nunc quis est, qui sic lavari sublineat?
Pauper sibi videtur ac sordidus, nisi parietes magnis & pretiosis
orbibus refulserint. Quid dicam de Catone? O quantum erat se-
culi decus, imperatorem triumphalem, censorium, & (quod super
omnia hæc est) Catonem uno caballo esse contentum, & ne toto
quidem! partem enim sarcinæ, ab utroque latere dependentes oc-
cupabant. Seneca *Ep.* 37. Hodie cònsque luxum increvisse suspicimus;
ut ne privatorum quidem aliquem facile repereris, quem cum
simili apparatu in publicum prodire non pudeat! Quantum etiam
ponderis habeat, auro cedroque digna laudati. Scipionis Oratio
qua

qua ille ad virtutem continentiae sectandam, juventutem non alligere potius, quam rapere videtur! Non est non (mihi crede) tantum ab hostibus armatis aetati nostrae periculum, quantum ab circumfusus undique voluptatibus. Qui istas suam temperantiam frenavit ac domuit, nam multo majus decus majoremque victoriam sibi peperit, quam nos Syphace victo habemus. *Liv: lib: 30.* His itaque calcaribus, quodsi puerorum animi incitentur, qui fieri potest, ut non lubentes ultroque virtutis arenam ingrediantur? Cui si fortius institerint, celebratissima illa virtutis miracula, quae prisca antiquitas tantopere suspexerat, recens etiam aetas nostra videbit. Verum & tempus & vestra me monet patientia AA. ut jam reliquum argumenti caput oratione perstringam.

III. De Religione siquidem dicendum est! sine qua & humanae scientiae non recte sapiunt, & ipsi hominum mores, quantaecunque honestatis laude conspiciunt beatam illam sempiternamque vitam nequeunt promereri. Quid enim juvat multa scire, si modum sciendi non teneas; quo videlicet ordine, quo studio, quo fine unum quodque sciri oporteat? Quo ordine? ut illud prius, quod maturius movet ad salutem. Quo studio? ut illud ardentius, quod vehementius ad amorem. Quo fine? ut non ad inanem gloriam & ostentationem, sed ad tuam & aliorum salutem. (*monet Mellissus Bernardus super Cant: ser: 36.*) Quis etiam ex virtute fructus, ubi virtus mortalis est & caduca? Omne igitur virtutis officium est, non peccare: quo profecto fungi non potest, qui Deum nescit. Quoniam ignorantia ejus, à quo bona oriuntur, imprudenter impingat in vitia, necesse est. *Last: Firm: divi: inst: l.6.c.5.* Quae quidem salutare institutiones non in Platoniorum Academiis, non in Stoicorum Gymnasiis, sed in Christi Schola docentur. Peramus sane à profanis Scriptoribus sermonis elegantiam, & ab iis verborum optimam suppellectilem mutuemur. Sunt illa velut pretiosa vasa, quae ab Aegyptiis furari sine piaculo licet. Sed absit, ut in iis (quemadmodum olim Augustinus de suis Magistris conquerebatur) incautis aulescentibus vinum erroris ab ebriis doctoribus propinetur. Qui autem poterimus id vitare periculi, nisi tot profanis ethnicorum hominum vocibus, inferatur Divina vox, Christianisque Scholis ut decet, quotidie intersit, immo praesideat unus hominum Magister Christus. Aetas siquidem illa simplex, docilis, innocens, plena candoris & modestiae, necdum imbuta pravis artibus, accipiendo Christi Evangelio maxime idonea est. Sed pro dolor! brevis illam morum castitatem inficiet humanarum opinio-

num

num labes, seculi contagio, consuetudinisque imperiosa flex, brevi omnia trahens ad se blandis cupiditatum lenociniis voluptas, tene- rum puerilis innocentiae florem subvertet, nisi contra dulce illud venenum adolescentium mentes, severis Christi praeceptis, tanquam Caelesti antidoto muniuntur.

Quid plura? Religio & Principes in officio, & subditos in obe- dientia institutis suis continet, sine quorum altero beatam Rempu- blicam nemo jure dixerit. Quod enim ij, qui imperii summa po- tiuntur, iusta imperent: quod inter linguas sublimiter se honoran- tium, & nimis honorabiliter salutantium, sibi que nimis humiliter obloquentium, non extollantur; quod se homines esse meminerint; quod potestatem suam ad Dei cultum dilatandum, majestatique ejus famulari faciant; quod Deum timeant, diligant & colant; quod plus ament regnum illud, ubi non timent habere consortes: quod tardi- us vindicent, & facile ignorent; quod eandem vindictam pro ne- cessitate regendae tuendaeque Reipublicae, non pro saturandis ini- micitiarum odiis, exerceant; quod eandem veniam non ad impu- nitatem iniquitatum, sed ad spem correctionis indulgeant; quod si quid aspere coguntur decernere, misericordiae lenitate, & benefi- ciorum largitate compensent: quod luxuria in eis tanto castigati- or, quanto potest esse liberior: quod demum si haec omnia faciant, non propter favorem inanis gloriae, sed propter charitatem felici- tatis aeternae operentur; nonne id omne, Religionis beneficio, quae sola in animos eorum dominatur, referendum est? Sed & subdi- torum erga Magistratum officia, an non Religio calitus haustis prae- ceptis moderatur? Illa profecto nos monet, agnoscere gubernatores nostros, non casu, aut pro libidine fortunae, sed aeterno Summi Dei consilio praefectos esse: Illa favorem & amorem in Principes, non ob panarum metum, sed sub strictissimis conscientiae vincu- lis, à nobis suavissime extorquet: Illa praestare legibus & manda- tis pietati & honestati consentaneis debitam obedientiam sanctissi- me praecipit: Illa conferre census ad gubernationem necessarios, solvere tributa, non fraudare vectigalia nobis injungit: Illa aequo animo iudicis accipere sententiam, & promeritis obire penas, le- gum transgressores hortatur: Illa timere Magistratus, errata sua, condonare, tolerare eorum injurias, sibi que ob illorum caede tempe- rare severissime imperat: Illa denique, quae in solemnibus, quae in privatis precationibus, pro salute atque felicitate Principis apud Divinum Numen intercedere, salutariter nos docet. O praecara Re- ligionis Christianae instituta! o summam & incredibilem in animos

affe-

effectusque humanos Religionis vim & potestatem! Non è Philo-
sophorum (repeto) Sectis hæc dogmata prodire, sed è Divinitatis Sa-
crario oracula ista derivata. Hic igitur nobis laborandum & iudan-
dum est: hic studium, hic cogitatio, hic cura desigenda: in hoc omnes
corporis animique nervi contendendi. Multa adhuc alia pro di-
gnitate argumenti hujus dicenda superessent AA. at nimis in lon-
gum oratio mea protraheretur, tempus est, ut littus appellam, &
vela contraham.

Jam igitur Lectissimi Adollescens, quid Instituti Academici ra-
tio postulet, abundè, ut reor, intellexistis: Vobis quid factò opus
sit, cogitate. Præcellens quidem, at multa accuratissime indigens
educandæ Juventutis officium, vobis cum tempore impendit. Sci-
tote adeò, Pædagogos graves imprimis, liberosque ab omni vitæ
crimine, dehinc egregiè doctos esse oportere. Nam quemadmodum
nutricum quanto purius, incorruptiusque lac fuerit, tantò infan-
tium, qui eo aluntur, valetudo magis atque robur adjuvatur: Ita
ii qui electiores litteras & mores habuerint, eò etiam disciplinis
firmiora relinquent probitatis & doctrinæ altius demum surrectu-
ra vestigia. Sed neque satis est Magistro, quæ profitetur scire,
nisi expedire ea possit explicare, & artem dexteritatemque ad rem
adjungat. Cavendum vobis quoque quàm maximè, ne altiora in-
tellectu, aut ea quæ vires vestræ ferre nequeant, unquam tente-
tis. Sunt enim plerique, qui dum metiri se nesciunt, quæ non
didicerunt, docere concupiscunt: qui pondus Magisterii tantò le-
vius æstimant, quanto vim magnitudinis illius ignorant. Præprimis
autem vultu placidos, sermone affabiles, affectibus decoctos, vos
qui cum debeat esse mansuetus & humilis ad omnes, ex diverso,
torvo vultu, tremantibus labiis, rugata fronte, effrenatis conviti-
is, facie inter ruborem & pallorem variata, clamore prostrepit,
errantes non tam ad bonum retrahit, quàm ad malum suâ savitiâ
præcipitat. Sed quid ego pluribus vos commoneo? indoles egre-
gia, ingenium acre, virtus inflammata, cum mihi, tum Almæ meæ
vestræque Altrici Universitati, optima quaque de vobis auguran-
tur. Eja Lectissimi Adollescens! tales vos in omni vitæ actione
exhibeatis, eòque omnes vestras curas conferte, ut cum nos reli-
quos omnes fato concedere natura jusserit, in vobis florentissimæ
hujus Academiæ nomen, laudesque perennent.



